



Neizmjerna mudrost u smjeni godišnjih doba i promjenjivosti vremena (Medina)

Hatib: dr. Abdullah ibn Abdurrahman el-Buajdžan

15. zul-kade 1442. po Hidžri / 25. juni 2021.

Sva hvala i zahvala pripadaju Allahu. Njega hvalimo, od Njega pomoć i oprost tražimo i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti.

Svjedočim da nema boga osim Allaha, Jedinog, Onoga Koji druga nema, i svjedočim da je Muhammed, sallallahu alejhi ve sellem, Njegov rob i poslanik, da je dostavio poslanicu, ispunio emanet, savjetovao ummet i borio se na Allahovom putu onako kako se treba boriti sve dok mu nije došla smrt, neka su na njega Allahova milost, blagoslov i mir, i na njegovu porodicu i ashabe, i sve one koji ih slijede u dobročinstvu do Sudnjeg dana.

Najbolji govor je Allahov govor, a najbolja uputa je uputa Muhammeda, sallallahu alejhi ve sellem. Najgore stvari u vjeri su novotarije, svaka novotarija je zabluda, a svaka zabluda vodi u Vatru. “O vjernici, bojte se Allaha onako kako se treba bojati i umirite samo kao muslimani!” (Ali Imran, 102)

O ljudi, bojte se Allaha i strahujte od Njegove kazne, i neka vas ne obmane nada u dug život i zaborav na edžel, smrtni čas, i ne priklanjajte se dunjaluku, jer je on kuća prolaska, nestajanja, iskušenja i ispita, a ahiret je kuća vječnosti i nagrade.

“Svako živo biće smrt će okusiti! I samo na Sudnjem danu dobit ćete u potpunosti plaće vaše, i ko bude od Vatre udaljen i u Džennet uveden – taj je postigao šta je želio; a život na ovome svijetu samo je varljivo naslađivanje.” (Ali Imran, 185)





Vrijeme se mijenja, smjenjuju se dani i noći, godišnja doba smjenjuju se svojim redoslijedom. Veliku hladnoću zamjenjuje velika vrućina, nestabilno vrijeme zamjenjuje stabilno i umjereno, a u svemu tome krije se Allahova neizmijerna mudrost, i sve je kod Njega s mjerom.

“Stvaranje nebesa i Zemlje, smjena noći i dana, lađa koja morem plovi s korisnim tovarom za ljude, kiša koju Allah pušta s neba pa tako u život vraća zemlju nakon mrtvila njezina - po kojoj je rasijao svakojaka živa bića, promjena vjetrova, oblaci koji između neba i Zemlje lebde – doista su dokazi za one koji imaju pameti.” (El-Bekara, 164)

O muslimani! Rasplamsala ljetna vrućina i vrele zrake sunca velika su opomena i veliko upozorenje na Allahovu kaznu, Allahov rasplamsali Džehennem, koji će do srca dopirati. “Nikada! Ona će buktinja sama biti, koja će udove čupati, zvat će onoga ko je glavu okretao i izbjegavao i zgrtao i skrivao.” (El-Mearidž, 15–18)

Ona je vatra užarena, voda ključala, u sjeni dima čađavog, u kojoj neće biti svježine ni ikakve dobrine. Velike i žestoke vrućine odušak su džehennemske vatre. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: “Vatra se požalila svome Gospodaru i kazala je: ‘Gospodaru, izjedoh sama sebe od žestine’, pa joj je Allah dao dva oduška: odušak zimi i odušak ljeti, a to su najveća vrućina i najveća hladnoća koje osjećate.” (Muttefekun alejhi)

Ebu Zerr el-Gifari, radijallahu anhu, kazuje: “Bili smo s Vjerovjesnikom, sallallahu alejhi ve sellem, pa je mujezin htio proučiti ezan za podne-namaz, a Vjerovjesnik, sallallahu alejhi ve sellem, rekao je: ‘Odgodi malo!’ Zatim je on ponovo htio učiti ezan, a Vjerovjesnik, sallallahu alejhi ve sellem, rekao mu je: ‘Odgodi malo!’, sve dok nismo vidijeli sjenu brežuljka. Vjerovjesnik, sallallahu alejhi ve sellem, tada je rekao: ‘Zaista su velike vrućine odušak džehennemske vatre, i kada se one dese, odgodite namaz.’” (Buhari)

O vjernici, čuvajte se Vatre, makar sa pola datule. Tako mi Allaha, niko ne može izdržati dunjalučku vatru, a kako će tek izdržati džehennemsku vatru! Ebu Hurejra,





radijallahu anhu, prenosi da je Vjerovjesnik, sallallahu alejhi ve sellem, rekao: "Ova vaša vatra, koju sin Ademov potpaljuje, tek je sedamdeseti dio džehennemske vrućine." Ashabi su rekli: "Allahov Poslanice, tako nam Allaha, onda je i ona dovoljna!" Na to Poslanik reče: "Džehennemska vatra jača je od nje za šezdeset devet stepeni, svaki stepen jednako je vruć kao i ona." (Muslim)

Velike vrućine u ljetnom periodu najbolji su vaiz koji čovjeka podsjeća na strahote Sudnjeg dana i Dan velikog izlaganja, kada ljudi, u skupinama, pohrle svome Gospodaru, goli, bos i neobrezani. "Dan u kome će žurno kao da kumirima hrle iz grobova izaći, oborenih pogleda i poniženjem oprhvani. To će biti onaj Dan kojim im se stalno prijeti!" (El-Mearidž, 43–44)

Nevolja i iskušenje povećat će se, Sunce će se približiti, vrućina pojačati, stajanje pred Gospodarom oduljiti, a riječ teška postati. Mikdad ibn Esved, radijallahu anhu, kazuje: "Na Sudnjem danu Sunce će se približiti ljudima na udaljenost od jedne milje, i ljudi će biti u znoju, svako prema svojim djelima. Nekome će znoj biti do članaka, nekome do koljena, nekome do pasa, a neko će biti sav u znoju." (Muslim)

Dunjalu je prolazni užitak, sjena koja nestaje i nekolicina dana. "... pa neka vas nikako život na ovome svijetu ne zavara i neka vas u Allaha šejtan ne pokoleba." (Lukman, 33)

"Život na ovome svijetu sličan je bilju zemaljskom na koje Mi spustimo s neba kišu s kojim se ona izmiješa, kojim se onda hrane ljudi i stoka. Pa kad se Zemlja ukrasi svojim ruhom i okiti i kad stanovnici njezini pomisle da su oni toga gospodari, dođe zapovijed Naša, noću ili danju, i Mi to pokosimo, kao da prije ničeg nije ni bilo. Eto, tako Mi potanko izlažemo dokaze narodu koji hoće da razmisli." (Junus, 24)

Hvala Allahu Koji pomaže onima koji od Njega pomoć traže, i Koji uslišava molbe onih koji su u potrebi, i Koji otklanja nevolju od onih koje je zadesila nevolja, i Koji sve ljude obasipa blagodatima. "Na Zemlji nema nijednog živog bića a da ga Allah ne hrani. On zna gdje će koje boraviti i gdje će sahranjeno biti. Sve to ima u jasnoj Knjizi." (Hud, 6)





Toplotni val, ljetne vrućine i pješčane oluje koje su ovih dana zahvatile Zemlju velika su pouka za sve nas i podsticaj da razmišljamo o stanju slabih i nemoćnih, koji sve ovo teško podnose i na svojim plećima nose ogroman teret. Smilujte se slabima i nemoćnima, ispunite njihove potrebe, solidarišite se s njima, pomozite im i pratite njihovo stanje, jer i vama će se Allah smilovati i pomoći vas zbog slabih među vama. Otklonite nevolju, tugu i brigu od drugih, jer ko otkloni nevolju od brata vjernika, Allah će od njega otkloniti nevolju na Sudnjem danu; ko olakša dužniku, Allah će njemu olakšati na dunjaluku i na ahiretu; ko pokrije sramotu muslimana, Allah će njemu pokriti sramotu na dunjaluku i na ahiretu. Allah je u pomoći Svome robu dok je rob u pomoći svome bratu.

O vjernici, drage volje Allahu zajam dajte, a On će vam mnogostruko vratiti i grijehе vam oprostiti.

“Ko je taj koji će Allahu drage volje zajam dati, pa da mu ga On mnogostruko vrati? – A Allah uskraćuje i obilno daje, i Njemu ćete se povratiti.” (El-Bekara, 245)

“A dobro koje za sebe unaprijed osigurate naći ćete kod Allaha još većim i dobit ćete još veću nagradu.” (El-Muzzemmil, 20)

Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: “Ko da odgodu dužniku, ili mu oprostio dio duga, Allah će ga na Sudnjem danu smjestiti u hlad Svoga Arša kada neće biti drugog hlada osim Njegovog.” (Tirmizi)

O ljudi, neprihvatljivo je da musliman svoju lijenost, neaktivnost, ostavljanje ibadeta, dobrih djela i propuštanje namaza u džematu opravdava ljetnim vrućinama. Nagrada se uvećava sa teškoćom, a Džennet je prekriven neugodnostima. Dani vrućine i neugodnosti su dani ispita i iskušenja. Allah je stvorio smrt i život da bi vas iskušao ko će ljepša djela raditi. Popravite svoja djela prije nego što prođe vrijeme. Allah će onoga čije srce bude vezano za džamiju natkriti Svojim hladom na Dan kada neće biti drugog hlada osim Njegovog. Ebu Hurejra, radijallahu anhu, prenosi da je Vjerovjesnik, sallallahu alejhi ve sellem, rekao: “Sedam osoba će Allah uvesti u Svoj





hlad onog Dana kada neće biti drugog hlada osim Njegovog: pravednog vladara, mladića koji je odrastao u pokornosti Allahu, čovjeka čije je srce vezano za džamiju, dvojicu ljudi koji se vole u ime Allaha, u Njegovo ime se sastaju i rastaju, čovjeka kojeg pozove lijepa i bogata žena na blud, a on odbije i kaže: 'Ja se bojim Allaha!', čovjeka koji daje sadaku tako da mu lijeva ruka ne zna šta mu udjeljuje desna i čovjeka koji se u samoći sjeti Allaha pa mu oči zasuze." (Muttefekun alejhi)

O vjernici, zahvaljujte Allahu na darovima i blagodatima, i zahvaljujte Mu na dobroti i plemenitosti, On vas obasipa balgodatima, vidljivim i nevidljivim. Uzvišeni kaže: "Od Allaha je svaka blagodat koju uživate" (En-Nahl, 53); "i ako biste Allahove blagodati brojali, ne biste ih nabrojali" (Ibrahim, 34).

Allah vam daje hlad i skloništa u brdima, i odjeću koja vas čuva od vrućine, i oklope koji vas u borbi štite, i dao vam je i brojne druge blagodati: suncobrane, struju, rashladne uređaje, frižidere, pa sjećajte se tih blagodati i zahvaljujte Mu na njima, a zahvalnost na tim blagodatima iskazuje se štednjom i nerasipanjem. Blagodati se čuvaju zahvalnošću, a gube nezahvalnošću. Uzvišeni Allah kaže: "... i kad je Gospodar vaš objavio: 'Ako budete zahvalni, Ja ću vam, zacijelo, još više dati; budete li nezahvalni, kazna Moja doista će stroga biti.'" (Ibrahim, 7)

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

